



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno CCCCXXXII. ad annum CCCCLI.

Parisiis, 1644

Epistola LII. Leonis Papae I. Ad Episcopos Galliae. Gratulatur ipsis orthodoxam fidem, quam ex eorum literis cognorat. Eutychem & Dioscorum in Synodo Calchedonensi damnatos significat.

urn:nbn:de:hbz:466:1-14584

EPISTOLA LII.
LEONIS PAPÆ I.
AD EPISCOPOS GALLIÆ.

Gratulatur ipsis orthodoxam fidem, quam ex eorum literis cognorat. Eutychem & Dioscorum in Synodo Calchedonensi damnatos significat.

Leo Romanæ urbis episcopus Rauennio, Rustico, Venerio, Constantino, Maximo, Armentario, Floro, Sabino, Valeriano, Constantio, Maximo, Asclepio, Nestario, Maximo, Vrso, Ingenuo, Justo, Valerio, Superuentori, Chrysaphio, Fonteio, Petronio, Hydatio, Aetherio, Eulalio, Eustachio, Fraterno, Victuro, Eugenio, Hilario, Vero, Amando, Gerontio, Proculiano, Juliano, Helladio, Armentario, Honorato, Eparchio, Anemio, Dynamio, Maximo, Ynantio, & Palladio, episcopis per Gallias constitutis.

OPTASSEMVS quidem fraternitatis vestræ literas eo tempore quo promiseratis accipere, vt profecturis ad orientem fratribus nostris, quos ad sanctam Synodum vice nostra pro catholice fidei defensione direximus, etiam vestræ sententiæ professio iungeretur. Sed cum multa obstacula inopinatam nobis intulerint tarditatem, quamlibet seras, & diu expectatas epistolas, per fratrem & coepiscopum nostrum Ingenulum gratanter accepimus: easque cum gaudio recensentes, probauimus, sicut confidebamus, eruditione Spiritus sancti caelestem in vobis vigere doctrinam: quam in orientalibus ecclesiis versutia hostis antiqui, per eos quos sequaces suos reperit, falsitasque fatigare conata est, cum catholica fides, quæ nulla sui est parte mutabilis, per ipsas aduersantium exercitationes, & validior efficiatur semper, & clarior: operante hæc gratia Dei, vt si qui forte ad hæc subtilia inimici iacula declinanda minus erant instructi, minusque solliciti, perceptis veritatis armis fierent contra impiorum mendaciâ fortiores. Quod ergo, sicut causa poscebat, fiduciam nostram, quam de vobis habemus in Domino, fideliter atque obedienter auxistis, multa exultatione gaudemus. Et merito nos cognoscimus fratribus & coepisco-

pis nostris orientalibus intimasse, quod secundum euangelicam & apostolicam traditionem de incarnatione Domini nostri Iesu Christi, vna esset omnium nostrum & indiscreta confessio; neque vllis eorum disputationibus detineri, vt aliter aliquid de summi & salutiferi sacramenti veritate sapiamus, quam & ex prædicatione sanctorum patrum, & ex auctoritate incommutabilis symboli didicimus ac docemus, damnatis ab vniuersali ecclesia, & nunc Eutyche, & antea Nestorio. Quorum si quis non ferendis impietatibus inharere delegerit, ipse se a corpore Christianæ vnitatis abscidit. Non enim vltra iam cuiquam excusationis refugium de ignorantia & inscientia, vel de intelligentiæ difficultate conceditur, cum hæc ipsa sexcentorum fere fratrum, coepiscoporumque nostrorum Synodus congregata, nullam artem ratiocinandi, nullum eloquium differendi contra fundamentum fidei inspirare permiserit: quoniam annitentibus per auxilium gratiæ Dei fratribus vicariis nostris, quorum plenissima extitit in omni actione deuotio, non solum factotibus Christi, sed etiam principibus & potestatibus Christianis, cunctisque clericis, plebibus, ordinibus, plene atque euidenter apparuit, hanc esse vere apostolicam fidem, ex diuinæ pietatis fonte manantem, quam sinceram, & ab omni face totius erroris alienam, sicut accepimus, prædicamus, & vniuerso iam mundo consentiente defendimus, extinctis toto orbe dogmatibus, quæ vel præcedens hæreticus ausus est inferre, vel subsequens, dissimili quidem commento, sed impietate compari. Nam sicut Nestorius non est toleratus, affirmans beatam Mariam hominis tantummodo fuisse genitricem, qui postmodum sit a Verbo deitatis susceptus; duabus scilicet naturis, & personis distinctis, vt neque ipse esset filius hominis, qui Filius Dei, neque vnus Christus in vtraque natura, sed alter sempiternus ex Patre, alter temporalis ex matre: cum euangelica auctoritas ita Verbum prædicet carnem factum, vt non duos Christos nec duos filios, sed in vno Domino Iesu Christo, & Dei & hominis nobis insinuet veritatem; vt vtriusque substantiæ, id est saluantis atque saluatæ, nec proprietas possit confundi, nec persona geminari. Sicut ergo Nestorius in suo

dogmate execrabilis, sic & Eutyches damnatum olim sectatus errorem, alia profanitate blasphemans, a catholica soliditatis compage refectus est: quia indoctis quibusdam nimiumq; simplicibus persuadere tentauit, quod Verbum Dei ita caro sit factum, vt veram carnem de ventre Virginis non sumpserit, nec nostri illum generis corpus habuisse, sed diuinitatis eius & carnis vnam esse naturam, vt vnum Dominum nostrum Iesum & falsum hominem, & Deum diceret esse passibilem: quod nec pietas fidei, nec ratio recipit sacramenti, vt aut in sua natura passibilis fuerit deitas, aut in susceptione humana mentita sit veritas. Quæ diabolicorum sensuum prodigiosa commenta, sancta nunc Synodus humilitatis nostræ scriptis, auctoritate domini mei beatissimi Petri apostoli & merito roboratis, religiosa vnanimitate consentiens, abominando, ab ecclesia Dei amputauit. Dioscorum quoque Alexandrinum in sua impietate manentem; ne illa ecclesia, quæ inter ipsa euangelii principia beatum Marcum, beatissimi Petri apostoli discipulum, in omnibus vtique doctrinis sui doctoris magisterio consonantem, habuit fundatorem, quæque postea recentioribus a nostra ætate temporibus Athanasium, Theophilum, & proxime Cyrillum, probatissimos præfules habuit, indignam captiuitatem sub hæretici dominatione pateretur. Vnde secundum magnam misericordiam Dei, vniuersos diaboli conatus, quibus ecclesiam Domini conturbare molitus est, noueritis esse destructos. Reddite igitur Deo gratias, fratres carissimi, & dignam gratiarum actionem, & oret nobiscum vestra dilectio, vt fratres nostros, quos expectatio nostra desiderat incolumes quamprimum rediisse lætemur, & de omnibus, quæ Domino adiuuante sunt gesta, plenius vos possimus instruere. Nam fratrem Ingenulum nolumus hac expectatione tardari, cum ob hoc ipsum properantius remeare debuerit, ne diutius vobis esset incognita omnium materia gaudiorum: quæ volumus per curam dilectionis vestræ etiam ad fratres nostros Hispaniæ episcopos peruenire, vt quod Deus operatus est nulli esse possit incognitum. Data Kalendis Februarii, Herculano viro clarissimo consule.